



1913–1918 жылдары Әлихан Бөкейхан, Ахмет Байтұрсынұлы, Міржақып Дулатұлы ыждағатымен Орынборда 265 саны шығып, большевизм теперішімен жабылды. 2006 жылы 22 наурызда Қоғабай Сәрсекеев Алматыда 266–санынан бастап қайта жаңғыртты.

**ВАКЦИНАЦИЯ:  
АҚИҚАТ ПЕН АҒЫЗ**



» 04 »

**ТҮРКІМЕНСТАН  
РЕСЕЙ ГАЗЫН ЕУРОПА  
НАРЫҒЫНАН  
ЫҒЫСТЫРА АЛА МА?**



» 05 »

**ЖАРТЫ ҒАСЫРЛЫҚ  
ТАРИХЫ БАР КОМЕДИЯ**



» 08 »



## ЖҰМЫРТҚА НЕГЕ ҚЫМБАТ?

**БІР ЖЫЛДА ЖҰМЫРТҚАНЫҢ  
БАҒАСЫ 20%-ҒА ҚЫМБАТТАДЫ**

Статистика комитетінің мәліметінше, 2020 жылы елімізде жұмыртқаның құны 20%-ға артты. 2021 жылдың алғашқы екі аптасында жұмыртқаның бағасы тағы 3,3%-ға қымбаттады. Сарапшылар бұл қымбатшылық кемінде үшінші тоқсанға дейін сақталатынын айтады. Яғни, осы жазға дейін жұмыртқаның бағасы қымбаттай береді. Ал, бағаның аспандап кетуіне не себеп? Сарапшылар не дейді?

**Мадияр ӘЗИЗҰЛЫ,**  
экономикалық шолушы

**БЫЛТЫР ҚАЗАҚСТАНДА  
ҚҰС ТҰМАУЫНАН  
ҚАНША ҚҰС ҚЫРЫЛДЫ?**

Жұмыртқа бағасының күн санап қымбаттауына бірнеше жағдай әсер еткен. Басты себеп – тауықтар мен балапандарды қынадай қырған құс тұмауы. Екіншіден, құс азығының қымбаттауы да жұмыртқа бағасына кері әсер етті. Құс фабрикаларына арналған шетелдік құрылғылардың бағасы да пандемия салдарынан аспандап кетті. Бұл – үшінші себеп.

Қазақстан жұмыртқа өндірушілер қауымдастығының төрағасы Максим Божконың есебінше, 2020 жылы отандық құс фабрикалары құс тұмауының салдарынан тауықтарының бес-тен бірінен айырылып қалған. Яғни, былтыр барлығы 2,5 млн бас құс аталған тұмаудың құрбанына айналған. Бұл саланың өкілдері үш млрд теңге шығынға батқан. Содан ұсақ құс фабрикаларының көбі жабылуға мәжбүр болған.

Максим Божконың мәліметінен Қазақстан құс өсірушілер одағының да есебі алшақ емес. Соңғысы былтырғы тұмаудан 2,3 млн бас құс қырылғанына сенімді. Ал, бес ірі құс фабрикасы ең көп жапа шеккен. Соның үшеуі Солтүстік Қазақстан, қалған екеуі Қостанай мен Алматы облыстарында орналасқан.

Қазақстан жұмыртқа өндірушілер қауымдастығы мен Қазақстан құс өсірушілер одағына қарағанда ресми мәлімет басқа сандарды көрсетеді. Мәселен, ҚР Ауыл шаруашылығы министрілігі 2020 жылғы құс тұмауынан 1,9 млн бас құстың қырылғанын мәлімдеді.

» 02-бетте

## «ЖАСТАР АРАСЫНДА ҚОҒАМДЫҚ САНАНЫ ЖАҢҒЫРТУДЫҢ НЕГІЗГІ ДРАЙВЕРІ»

**ЖОҒАРЫ ОҚУ ОРЫНДАРЫНЫҢ РЕКТОРЛАРЫМЕН «РУХАНИ ЖАҢҒЫРУ»  
БАҒДАРЛАМАСЫНЫҢ ЖҮЗЕГЕ АСЫРЫЛУЫ ТАЛҚЫЛАНДЫ**



Әл-Фараби атындағы Қазақ ұлттық университетінде ҚР Ақпарат және қоғамдық даму министрі Аида Балаеваның Алматы қаласының жоғары оқу орындарының ректорларымен кездесуі өтті. Кездесу барысында «Рухани жаңғыру» бағдарламасының ағымдағы нәтижелері, Ұлттық жаңғыру кезеңіне көшуі бойынша Жол картасы жобасы, қоғамдық сананы жаңғырту аясында білім беру саласының өзекті мәселелері және «Рухани жаңғыру» қағидаттарын білім беру процесіне интеграциялау мәселелері талқыланды. Бұл туралы министрліктің Баспасөз қызметі хабарлады.

Бағдарламаны жүзеге асырудағы білім беру институттарының ерекше рөлін: «Бүгінгі таңда қазақстандық жоғары оқу орындары адами капиталды қалыптастыру субъектілері ретінде кәсіби мамандарды ғана емес, сондай-ақ жоғары рухани құндылықтары бар, бәсекеге қабілетті және

санасы ашық азаматтарды қалыптастыра отырып, жастар арасында қоғамдық сананы жаңғыртудың негізгі драйверлері болып табылады», – деп атап өтті ҚР Ақпарат және қоғамдық даму министрі Аида Балаева.

» 02-бетте



## ТӘУЕЛСІЗДІК ЖЫРШЫСЫ

**ЖАҢА ПОЭЗИЯНЫҢ АЛҒАШҚЫ  
ТУ ҰСТАУШЫСЫ БОЛЫП  
АХМЕТ БАЙТҰРСЫНҰЛЫ ҚАШАН ДА  
ТАРИХ БИІГІНДЕ ТҰРАДЫ**

Қазақ поэзиясының ұлттық сипат алып, дами бастаған тұсынан бергі тарихына көз салсақ, оған желі болып тартылған тұтас бір ұлттық идеяны көреміз. Ол – ұлттық тәуелсіздік идеясы. Арғы заманда «көшерін жел, қонарын сай біліп» жүрген көшпелі ел сыртқы жаудан қорғану, ешкімге тәуелді болып қалмау қамы үшін халықты ерлікке, күреске үгіттеген жауынгер жыр тудырса, бергі заманда орыс отаршылдығының езгісіне күңіреніп, зар-заман поэзиясын тудырды.

**Серік ҚИРАБАЕВ,**  
ҚР ҰҒА академигі, профессор

Бірде Исатай мен Махамбет болып, бірде Кене хан, Сырым батыр болып арпалысып, отаршылдыққа қарсы тұрған халық жеңіліп, опық жеді. Осының бәрі әдебиетте ұлт тағдырының аяншты суретіне айналды. Абай мен Ыбырай да ұлт тәуелсіздігі үшін күрестен тыс тұрмайды. Бірақ, олар отаршылдыққа қарсы ашық күресті уағыздаған жоқ. Елді оқу-білімге, өнерге шақырып, алдыңғы қатарлы елдермен теңелу арқылы ғана құлдықтан, езгіден құтылуға болатынын көрді, «қалың елі – қазағына» осы жолды нұсқады. Олардан қалған ағартушылық, демократтық идея кейінгі әдебиет үшін жаңа бағыт-бағдарды аңғартқандай еді.

» 06-бетте

Әлемдік экономикада туризм саласының айшықты орын алатынын бұған дейін газетімізде талай жазғанымызды көзі қарақты оқырман жақсы біледі. Өйткені, Дүниежүзілік туризм ұйымы 2019 жылы әлемдегі туристердің саны 1,5 млрд адамға жеткенін, әлемнің 330 млн адамы осы саладан нәпақасын тапқанын жариялады. Сөйтіп, туризм саласы коронавирус пандемиясына дейін, яғни 2019 жылы 9 трлн доллар пайдаға кенеліп, әлемдік жалпы ішкі өнімнің 10 пайызын құраған. Әрине, әлемді әбігерге салып жатқан коронавирус пандемиясы тышқан жылы туризм саласын тығырыққа тірегені жасырын емес. Аталған сала биылғы жылы да 2019 жылдың көрсеткіштеріне жақындай алмайтыны белгілі. Дегенмен, бұл туризм саласының өмір бойы тұралап қалатынын білдірмесе керек. Түбі «көзге көрінбейтін жау» тізе бүгеді. Бұл – өтпелі кезең. Содан туризм қайтадан құлашын кеңге жаяды. Демек, таңғажайып табиғаты, тамыры тереңге тартылған тарихы, қайталанбас бай мәдениеті бар еліміз үшін енді бұл саланы дамытуда уақыт оздыруға тағы болмайды.

## ҚАРА ТУРИЗМ

**ҚАЗАҚСТАНҒА ТУРИЗМНІҢ БҰЛ ТҮРІН ДАМУҒА НЕ КЕДЕРГІ?**

**Жасұлан МӘУЛЕНҰЛЫ,**  
бас редактор

**ҚАРА ТУРИЗМ ҚАЛАЙ  
ПАЙДА БОЛДЫ?**

Рас, туризмнің түрі көп. Ал, қара туризм туралы бірі білсе, бірі білмес. Әуелі туризмнің бұл түріне анықтама беріп көрейік.

Адамдардың тарихи маңызы зор және жаппай адам өлімімен, қайғылы оқиғалармен және апаттармен байланысты жерлерге баруға деген

ұмтылысынан қара туризм дүниеге келсе керек. Ал, «Қара туризм» терминінің авторы – Глазго университетінің профессоры Джон Леннон. Шотландық профессордың айтуынша, адамдардың мұндай жерлерге қызығушылық танытып жатқандарына шын мәнінде таңғалуға да болмайды. Өйткені, өлім жазасы мен кескілескен шайқастарды көретін адамдар бұрын да болған, қазір де бар. Оған Италия елінің мақтанышына айналған Колизей мысал бола алады.

Атақты Колизейді 8 жылда құлдырат тұрғызған. Оның құрылысын 72-ші жылы Веспасиан император бастап, 80-ші жылы оның ұлы Тит аяқтаған.



■ Припять қаласындағы Чернобыль апатынан зардап шеккен мектеп ғимараты. Апатқа дейін қалада 50 мыңдай адам тұрған, 1986 жылдан бері қала қаңырап бос қалған. 2019 жылы Чернобыль аймағына 150 мыңдай туристер барған. Апатты аймаққа бір күндік турлар 100 АҚШ долларынан басталады

Ғимарат іргетасы мәрмәр кесектерден қаланған. Ішкі қабырғалардың құрылысына травертин тастары пайдаланылған. Ғимаратқа бір сәтте елу мыңдай адам сыйған. Амфитеатрдың жалпы биіктігі 44 метрді құраған. Аренаның жан-жағы төрмен қоршалған.

» 03-бетте

#Баспасөз2021

«QAZAQ» ГАЗЕТИНЕ  
ЖАЗЫЛУ ЖЫЛ  
БОЙЫ ТОҚТАМАЙДЫ

ИНДЕКС 64048















